

Uunga siunnersuut: Tuniniaanissamik nittarsaassisarneq aamma nalunaaqutsersuisarneq pillugu Inatsisartut Inatsisaata allanngortinneqarnissaa pillugu Inatsisartut Inatsisaata allanngortinnissaa pillugu Inatsisartut inatsisaat (Tuniniaanissamik nittarsaassisarnermut inatsit)

Nunanut Allanut, Inuutissarsiutinut Aatsitassanullu Naalakkersuisoq

Siullermeerneqarnera

Siulittaasoq qujanaq.

Kalaallit qanoq illersornerusinnaavagut?

Isorliunerusuniittut qanoq illersornerusinnaavagut?

Taamatut siammasinnerulaartumik apeqquteqarlunga aallarniuteqalaarniarpunga.

Siunnersuummi sammisaq siammasinnerusumik qiviarnerusariaqarparput.

Siunnersuut una siunertaa paasisinnaavarput.

Soorunami meeqqat inuusuttullu illersorneqartussaapput aamma inuit atuinermut taarsigassarsisut.

Teknologi atorlugu attaveqaqatigiinnermilu ineriartornerit tuniniaanissamik nittarsaassisarnermullu unammillernartunik pilersitsisaramik malittarisassat nutarsartariaqarpagut. Nutarsartariaqarpagut ullutsinni ussassaarutit pasinaarsaakkat, tassa "skjulte reklamer" pinngitsoortinniarutsigit. Taanna akerlileruminaatsipparput.

Kisianni nunatsinni taarsigassarsineq tungaatigut illersugassat amerlapput. Kalaallit, ingammik sineriatsinni isorliunerusuniittut, illersugassaapput.

Taamaammat siunnersuut attartuinermut, taarsigassarsinermut tunngammat Naleqqamiit taasariaqarparput una.

Sooruna isorliunerusuni attartuisarneq, taarsigassarsineq taamak ilungersunartigisumik inissisimasoq? Taarsigassarsinerlu taamaakkaluartoq sooruna suli pisarpa?

Taarsigassarsiniartut allanik periarfissaqarneq ajoramik!

Isorliunerusuniittut periarfissai annikittuarannguupput. Bankimi attartuisinnaanerat killeqangaatsiarpoq ilaatigullu periarfissaqanngiivittarlutik.

Qeqertarsuarmioq umiatsiaararsortoq motooria ajortissimagami bankimi attartuiniarluni saaffiginnikkami itigartitaavoq. Sooruna? Aalisarneq pillugu Inatsit tunngavilersuutigalugu bankit taarsigassarsitserusunnginnamik.

Taava umiatsiaararsortut qanoq iliussagamik?

Takulissavagullu aningaasaatilippassuit, pisoorsuit appasittumik ernialinnik attartuisinnaanerit ajornanngitsuaraasoq

Isorliunerusuni erniat qaffasissorujussuupput. Tassagooq ilaatigut umiatsaararsortut taarsigassarsitsissallugit aarlerinartuugami.

Isorliunerusuniittut illutaarusukkunik illuummik qularnaveeqqusiilluni (realkredit), taarsigassarsisinnaanngilalluunniit.

Sooruna nunatsinni erniat taamak qaffasitsigisartut? Sooruna pissakinnerusut bankini taarsigassarsiniaraangamik taamak mattussorneqartartigisut? Iluatsikkaangatalu taarsigassarsiaat ilungersunartumik isikkoqartarlutik.

Grønlandsbanken-ip akigititat nalunaarsuutaani takuneqarsinnaavoq erniat qaffasinnerpaamik killigititaasoq tassaasoq 20,25 %.

Taavalu qaavatigut sippuinermit akiliut, tassa "overtræksrente" 7 %-iulluni.

Taava qaffasinnerpaamik erniaasinnaasoq 27 % tungaanoorsinnaavoq.

Sooruna taamak qaffasitsigissasut? Sooruna qaffasinnerpaamik killigititaasoq apparsarsinnaanngikkipput?

Kalaallit sineriatsinni, ingammik isorliunerusuni, atugarisaat imaannaanngitsumik inissisimapput.

Periarfissaarutileqqapput. Isorliunerusut inuuserneqarput atugarisaat taamak ilungersunartigisumik inissisimagamik.

Isorliunerusuniittut assut erloqipput.

Pitsaanerusemik inissisimatittariaqarpagut.

Taakkununga pitsaanerusemik sinaakkutissiuisariaqarpagut.

Aallaqqaataani oqaatigivara siunnersuutip siunertaa paasisinnaagipput.

Soorunami meeqqat inuusuttullu illersorneqartussaapput aamma inuit atuinermit taarsigassarsisut.

Taamaamat siunnersuut siunertaa tunngaviummik akerlerinngilarput.

Takusinnaaginnarparput imarisaata attuumassuteqartunut tungaatigut suliassaqaangaartugut.

Siunnersuutip pitsaaqutai ilaqarput:

- ussassaarutit pasinaarsaakkat akiorniarlugit sakkortunerusumik illersugaqarneq
- meeqqat inuusuttullu inuit attaveqaaqatigiittarfiini (sociale medier) pitsaanerususumik illersorneqarnissaat
- atuisarnermut taarsigassarsianut akisoorujussuarnut sukaterineq

Kisianni tassa atuisarnermut taarsigassarsineq akisunera qivialaassagutsigu immitsinnut aperisariaqarpugut aningaaseriviit taarsigassarsisitsisut tungaatigut allatut aaqqissuussisinnaannginnersugut.

Tassami, nunani allani takuneqarsinnaavoq aningaaseriviit allatut aaqqissugaasut erniaateqaratik.

Aningaaseriviit taakku taarsigassarsisitsigaangamik erniaatit atornagit kisianni pisassarisat imal. pigisat nalillit tunngavigalugit aningaasalersuineq, taaneqartartoq “aktivbaseret finansiering”, iluanaarutit (avance), leasingi, akiliutit kiisalu aarlerinermik avitseqatigiinneq aqqutigalugit ingerlattaarpat.

Nunatsinni inuit iluaqutigisinnaavaat taamatut aaqqissuineq assersuutigalu umiatsiartaarusuttunut, inuit inianut pitsanngorsaarusuttunut, aalisarnermut atortorissaaruteqartunut il.il.

Nunatsinni aningaaseriviit, bankit, taamatut aaqqissorsinnaavagut, taarsigassarsinermut erniaatinullu tunngasut aaqqissuussinermi ilanngullugit.

Erniaalersuineq qaffasittoq bankini aningaaserivinnilu ingerlatsinermi pingaarnarpaatut tunngaviginagu.

Bankit aningaaseriviillu aningaasarsiusanersut pingaarnarpaatut apeqqutaatinneqartussaangilaq. Apeqqutaasussaasoq tassaavoq aningaasarsiorneq inuiaqatigiinni piviusumik aningaasaqarnermik (realøkonomi) ineriartortitsinikkut pisassanersoq, imaluunniit akiitsut akisunerulersinnerisigut pisassanersoq.

Kalaallit illutaarusuttut illuliorusuttut periarfissinniartigit!

Kalaallit aalisartut umiatsiartaarusuttut imaluunniit nutaanik motoritaarusuttut periarfissinniartigit!

Periarfissat tamarmik qiviartariaqarpagut kalaallit atugarisaat pitsanngorsassagutsigit. Nutaamik aamma eqqarsartariaqarpugut asuli ajortumik ingerlasut allanngortinnagit ingerlatiinnarujoorlugit.



Kalaallit atuinermut taarsigassarsisut illersuvissagutsigit taava akuerisussaannikkaluarparput aningaaseriviit bankillu aaqqissugaaneranni atuisarnermut akiitsut qaffasissut annertusiartuinnassasut.

Naleqqamit aningaasalersuinermit aaqqissuussinerit ineriartornissaat piviusumik aningaasaqarnermik, tassa realøkonomi-mut tunngaveqartoq ujartorparput.

Qujanaq.